

եւ արար ժողով մեծ . ետ կոչել 'ի ժողով անդր զհամայն միարանս Ս . Յակոբայ և զժողովուրդս Հայոց բնակեալ յԵրուսաղէմ , և ընթերցաւ առաջի ամենեցուն զհրովարտակրն Արքայի . ապա եհարց ցմիարանս Հայոց , թէ արդարեւ այդպէս իցէ Մինաս վարդապետն , որպէս լուսյք այժմ 'ի բանից հրովարտակին : Նոքա ետուն պատասխանի , Մինաս վարդապետ լեալ միարան 'ի վանս մեր 'ի 10 ամաց հետէ , վարեալ է զպաշտօն փոխանորդութեան և զիշխանութիւն Պատրիարքութեան , զտուրս ողորմութեան ուխտաւորաց և զնուէրս ազգին՝ զոր ժողովեաց 'ի ժամանակս իշխանութեան իւրոյ , ծախեաց 'ի կարեւոր պէտս շինութեան եւ նորոգութեան վանօրէից և եկեղեցեաց մերոց , և խնամ կալաւ աղքատաց և տնանկաց եղելոց այսր , և ոչ վատնեաց նա զինչս ազգին 'ի կամս իւր , մինչ չհոգալ ըզկարեւոր պէտս անձին իւրոյ , և հաւատարմութեամբ ծառայեալ անթերի կատարեաց զամենայն գործս վանաց , և ոչ երբէք հակամիտեալ է նորա 'ի Լատին կրօնս : Ուստի մեք ամենեքեան յատենի բազմութեան ժողովոյս յայտ առնեմք զգոհունակութիւն սրտից մերոց զնմանէ : Եւ դատաւորն ըստ պատմութեան նոցին գրեալ յայտ արար 'ի Գուռն . եւ թէ որպէս վճարեաց զգործն քննութեան 'ի բազմամբոյս ժողովի անդ : \\\ \ \ \ \ ( 1702 ) :

—◆—

Գ Լ Ո Ի Խ Ծ Գ .

Վէճ պլաղգեաց : Կողտուումն վանաց Ս . Փրկչի . և տղանումն Հմարանաց : Պատրիարքութիւն Մինաս վարդապետի եւ վախճան նորին : Հակառակութիւն Լատինաց : Վէճ 'ի դերեզմանի Ս . Աստուածածնի : Հակառակութիւն պլաղգեաց :

**Ա**Յ) մինչդեռ Աւետիք և արք իւր յուզեալ զայսպիսի անօգուտ խնդիրս՝ մաքառէին ընդ Մինասոյ և ընդ միարանս վանաց , և զբաղեալ էին 'ի կռիւս եւ 'ի վէճս իւրեանց , յարեան ոմանք յայլազգեաց Երուսաղէմի , որք էին վերատեսուչք Սալահիյէ դպրոցին . և զնացեալ առ դա-